



Tir Yimiyim

www.tiryimiyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimiyim@gmail.com

TAPAK 8

Yangia anidakangma :

f Tir Yimiyim

Instagram tiryimiyim@aolima

YouTube tir yimiyim

TAPAK 3

Egypt Tir el-Sisi-i state of emergency agienogo

Jyotiraditya Scindia-i Shillong-Dibrugarh tayimtsü tenzüksü



VOL. XIX NO. 19 (ADOK 19) DIMAPUR RASEMNÜ (WEDNESDAY) MONGPUTENI (OCTOBER) 27, 2021 ₹ 5.00

NFHRCC-i Nagaland sorkar dang pelar

Dimapur, October 26, 2021 (TYO): Nagaland Foothill Road Coordination Committee (NFHRCC)-i September 2021 nung Nagaland sorkar dang mepishiba ama Foothills Road yanglutsü atema Rs. 20 crore lezmüksüba atema tenüngsang agütsür, ta Co-Convenor, Hokiye Yephthomi aser General Secretary W. Lemba Chang nati

metetdaksüogo. NFHRCC-i bangdakpurtem dang mapa inyakba mongpu tenzüker asünung iba mapa tekaraba inyaka aotsü shiogo. Külen, Foothills Road indang file CMO atongba angashia kanga pelar. Nagaland sorkari Naga nungger taginüba angateta temolung agüja inyaksü ayongzüker, ta NFHRCC-isa ashi.

Myanmar refugee tem Nagaland-i arur

Kohima, October 26, 2021 (TYO): Myanmar nungi refugee tem Mon district-i aruogo ta Nagaland sorkari Mongulbar metetdaksü. Myanmar nungi nisungtem arua lir saka parnok teimba ka Myanmar nung aliba Naga nungger lir, ta Planning & Coordination, Land Revenue and Parliamentary Affairs Minister, Neiba Kronu-i ashi. "Myanmar nungi asen kulem

nübertem arur aser arogotem o kin hohotemi meimchir meimba tangatetba nung parnok jenokdaksür" ta pai ashi. State sorkari Myanmar Naga nungger kwi arua lir osang mejangja lir saka tekaraba nung iba osang jangjatsü, ta Kronu-isa shisem. "Myanmar nungi asen nisungtem aruba yaritsüla" ta paisa ashi.

CS-i Hornbill Festival atema senden ayonger

Dimapur, October 26, 2021 (TYO): Nagaland Chief Secretary October 28, 2021 nü Hornbill Festival, 2021 atema senden ayonger ta Department of Tourism-i metetdaksüogo.

Sendenji Secretariat Conference Hall, Kohima nung nikongdang 2:00 ako nung amentsü anungji line department ajak adentsü mepishir, ta parnokisa ashi.

COVID-19 Nagaland: 21 dak putet & 39 taneptsü angu

Kohima, October 26, 2021 (TYO): Mongulbar nü Nagaland nung nisung 21 dak COVID-19 putet aser parnok züngsema nisung 31,747 kumogo. "Tanü putetertemji Dimapur nung 14, Kohima nung 4 aser Wokha nung 3 lir" ta Integrated Disease Surveillance Project atema State Nodal Officer, Dr Nyanthung Kikon-i ashi. "Tesüiba ghonda 24 tsüngda COVID-19 puteta alir nisung 39 taneptsü angu. Parnokji Tuensang nung 22, Dimapur nung 9 aser Kohima nung 8 lir" ta paisa ashi. Nisung 31,747 rongnungji 29,807 taneptsü nguogo aser ibaji 93.88% taneptsü anguba lir, ta paisa ashi. Tang nisung 225 anepaludar

saka parnok 172 dakbo shirangba yimya kecha mali, ta Dr Kikon-isa shisem. "Hombar tashi nung nisung 707,264 nem COVID-19 vaccine indang dose 11,81,192 agütsüogo" ta State Immunization Officer, Dr Ritu Thurr-i ashi. "Vaccine agirtemji frontline workers 60,957, healthcare workers 15,998, arishi küm 45 ser tempur 201,681 aser arishi küm 18 nungi 44 tsüngda alir 428,628 lir" ta paisa ashi. "Vaccine agirtem rongnungji nisung 473,928-i dose anaprong agiogo. Parnokji frontline workers 47,899, healthcare workers 13,367, arishi küm 45 ser tempur 157,804 aser arishi küm 18 nungi 44 tsüngda alir 254,858 lir" ta Dr Thurr-isa metetdaksü.

BJP sorkari Hindu tekülem ki yangluba aitsür: Manipur Congress

Imphal, October 26, 2021 (Agencies): Meitei nungger alemli tamangba yimsü Sanamahi indang temeshi tesem ka nung Hindu tekülem yangludaksüba atema Manipur Congress-i sorkar aitsüogo. Iba tesem nung Hindu tekülem ki yangluba ya tamangba yimsü mezüngmeshiba lir, ta Manipur Congress-i ashi. "Manipur nung BJP sorkari Meitei Sanamahi tamangba yimsü anema mapa inyakba Manipur Congress-i aitsür" ta Manipur Congress lennir N Bhupenda Meitei-i ashi. "Imphal nung aliba Sana Konung (Royal Palace Complex) nung BJP sorkari Meitei/Meitei nungger tamangba yimsü Sanamahi mezüngmeshiba aitsür" ta Hombar nü Manipur Congress working president K Meghachandra-ia Hombar nü metetdaksüogo.

Deobarnü Pandit Loishang Sana Konung (Royal Palace Complex) nung Pandit Loishang nung Hindu tekülem ki ka yanglutsü tenzüka sülen tensa mejungi kumogo. Pandit Loishang (institute of Amaiba and Amaibis) ya Meitei nungger lisopur tamangba yimsü kümzüka ayudak ta züngshir. Iba ya Imphal nung aliba Royal Palace (Sana Konung) indang campus nung lir. Campus nung tekülem ki yanglutsü atema bener aruba osettem nung Amaiba aser Amaibis (priests and priestess)-i ni senoktsütsü meranga liasü. Ajisüaka, police-i Amaiba aser Amaibis nungger noktanga liasü. Iba tatalokba sülen nungi sepaitemi iba tesem anüker. Pandit Loishang züngsemtemi campus telung nung Hindu tekülem ki yangluba anema lungkak aityonga arur.

Nagaland nung Nov 1 nungi Dec 15 tashi Unlock-8 alitsü

Kohima, October 26, 2021 (TYO): Nagaland sorkari December 15, 2021 tashi Unlock-8 alitsü telemtetba agiogo. Nagaland nung Covid-19 wara ajanga tenokdangba aika agüja aliba salayonga arur aser ano anogo 45 tashi talenba kar salatsü telemtetba agiogo. Iba nung class tilatem atema school lapoktsü aser night curfew agientsü dena lir. July 1, 2021 nungi Nagaland sorkari Unlock tenzüker aser shilem balala lemsar aruba October 31 nü tembangtsü. "Unlock-8 ya November 1 nungi December 15, 2021 tashi alitsü" ta sorkar spokesperson

aser minister Neiba Kronu-i ashi. Chief Minister Neiphu Rio menden ser High Powered Committee (HPC) on Covid-19 senden nung iba telemtetba agi, ta pai ashi. Taoba Unlock mapang Covid inyakyim benschia class tem agitsü melaogo aser tang HPC-i class tilatem lapoktsü temelaba agütsüogo. Talisa, iba ya standard 1 nungi 4 tashi atema aser academic final examinations agitsü atema lir" ta Minister Kronu-i ashi. Ajisüaka, pei pei tensa asadanger District Task Force (DTF) temi dang tatembang telemtetba agitsü, ta paisa

shisem. Tang aonung 10:00 ako nungi anepdang 4:00 ako tashi night curfew alir saka Unlock-8 nungbo iba ya agiener. Ano, sorkar aser nija passenger vehicles tem akhi ama senzütsü melar ta Kronu-isa metetdaksü. Minister Kronu-isa nübertem dang COVID-19 vaccine agitsü ayongzüker aser DTF tem dang vaccine agütsüba mapa meranga inyaksü mepishi. Taküm Hornbill Festival amongtsü saka Tourism Department-i dang anogo kwi amongtsü'ar telemtetba agitsü. Vaccine anaprong agiba tourist tem dang arudaksütsü, ta paisa ashi.

Nagaland nung CWSN aser PWDs tanur ajak züngdaksütsüla

Kohima, October 26, 2021 (TYO): Nagaland nung children with special needs (CWSN) aser matamabensar tanurtem bendanga amshiba ajanga tsüraburtemi parnok miimbanga ayur aser iba jagi inclusive education nung timtem ajurur, ta School Education Principal Director, Shanavas C-i ashi. Inclusive Education indang anogo ka workshop agidang Shanavas-i iba osang metetdaksü. "Nagaland nung jilatem nung dang special schools lapoka lir aser yimtsüngtem nungbo mali. Nagaland nung election mapang dang people with disabilities (PwDs) indang osang bendener aser iba ya kanga dang tim masü. Ano, school tem nung CWSNs indang data shitak mali" ta Shanavas-i ashi. Külen, parnok bendanga amshiba ajanga PwDs aser CWSNs-ia parnok yimjak nung mesayunür. Nagaland nung inclusive education mapa küma inyaksü atema CWSNs indang

tsüraburtem ajungshiteptsüla, ta paisa metetdaksü. Education Department-i yaria Educational Management and Information System (EMIS) tashi itshitsü aser nisungtem ajungmesoa osang tejangja bendentsü, ta Shanavas-isa metetdaksü. "Special needs aketer dena tanur ajaki right to education angutsüla aser Nagaland Board of School Education (NBSE)-i school ajak nung iba atema inyaksü imlar" ta NBSE chairperson Asano Sekhose-ia ashi. Shisaliok rejutem ajak NBSE kübok register süa lir aser parnok nem CWSN atema shisaliok agütsütsü tetuyuba agüja lir, ta laisa ashi. Tesayurtemia CWSN tanurtem nem 'remedial teaching' agütsütsüla aser school temi infrastructure shitak ayutsüla, ta Asano Sekhose-isa ashi. Matamabensaba tanurtem ya kanga teküpok jenjang nung ayur aser balaka benschir, ta State

Disability Commissioner Diethono Nakhro-ia ashi. Item tanurtemi school azüngtsü tenzüka primary mesüra secondary education tashi mezüngteter aser jenjang temabai atuba ama parnok tebandang tuluba akümer, ta laisa ashi. "Asenoki iba amaia dang moudaksütsüla anungji bangdak department tem aser teloktem aser sendaka alirtem longjemer temelenshi ka bener arutsüla" ta Diethono Nakhro-isa ashi. Commission-i inyakbatem rongnung School Education department ya tongtipang ka lir aser talisa National Education Policy tasen benokba mapang tesentaktep tajungba yur inyaksü nüngdaker, ta laisa metetdaksü. "The Rights of Persons with Disabilities Act 2016 ajanga state sorkari teyari agütsüba mesüra agizüka aliba shisaliok reju ajak nung children with disabilities nem inclusive education agütsütsü lateta lir" ta Nakhro-isa ashi.

ULBs nung tetsür nem shilem lezmüksütsü jembir

Dimapur, October 26, 2021 (TYO): Maparen ajak nung tetsürtemi shilem agitsüba tongtipang aser iba atema sorkari civil society tem aser kin hohotem den angatetteptsü tenzükogo, ta Minister Neiba Kronu-i ashi. Tawa tu Cabinet Subcommittee on Women Reservation senden amandang State Chief Secretary-i anir luden ka ajanga tetsür nem shilem lezmüksü ajanga tetsükdaksü aser tajangzüker angubatem asadangsü lemtet, ta pai metetdaksü. Iba senden nung Eastern Nagaland People's Organisation, Central Nagaland Tribes Council

aser Tenyimia teloktem nungi teshimtet nübotem jaoka aden aser Nagaland University nungi Prof Rosemary Dzuvichu aser Secretary, Science and Technology department Sotsula na sorkar tenüng nung adentsü shimogo, ta Minister Kronu-i ashi. "Asenok külemi onüktem angatetteptsü mapang ka lir. Tetsürtem nem shilem lezmüksütsü atema asenok külemi mener telemtetba agitsüla" ta paisa shisem. "Urban local bodies indang election magitetba ajanga municipal aser town council ketdangsüba nung tetsükdaksü ajurur. Iba atema sorkari

'temporary basis' nung züngsemtem shimoktsü telemtetba agiogo kechiyong ULBs nung Chief Administrative Officer-i dangbo jila ajunga ketdangsüba mereprangteter" ta Kronu-isa metetdaksü. Sorkari shimtetba nübotemji 'interim body' dang asütsü aser municipal o town council indang elections agiba sülen parnok anentsü, ta paisa shisem. NSSB: Eastern Naga Students' Federation (ENSF)-i Nagaland Staff Selection Board (NSSB) indang draft magizüka atema Kronu-isa "onoki kaketshir telok den jembidar aser yakta angatetteptsü ta sorkari imlar" ta metetdaksü.

Nagaland Police Retired Officer's Association lokti senden amen



Dimapur, Mongputeni/Oct. 26 (TYO): Nagaland Police Retired Officer's Association (NPROA) pur 6 buba Annual General Meeting ya October 25, 2021 nü Rhododendron Hall, Police Complex, Chumukedima nung mena liasü.

Sangdong ka ajanga ashiba agi, iba senden nung nisung 45 shi arua aden aser item rongnung Assam, Manipur, West Bengal nungia liasü aser arishi küm 88 tain Ruvilhou Angami, Retd. NPS ya ajak dang tambusang liasü.

Iba senden ya Nriilo Himb, Retd. NPS ajanga sarasadema tenzük, kong Imsu Sungit Ao, Retd. NPS menden liasü.

NPROA tir I. Bendang Ao, Retd. NPS ajanga tarur pela

agizükba o jembia liasü. Senden nung V. Solo, Retd. NPS ajanga tajungshi o jembia aser T. Chaya, Retd. NPS ajanga tongti zülur osang agüja liasü.

Iba senden nung temolunger temi pei bilemba lemsatepsü mapang lapoktsüba nung M K Baruah, Retd. NPS; S M Singh, Retd. NPS aser dangartemia jembia aser association temaba jenjangi ajungjetsü atema onük balala lemsatepa liasü.

NS Rengma, Retd. NPS ajanga Treasurer Report agütsü aser Agwanye Seb, Retd. NPS ajanga melepzüng o jembia liasü. Iba senden nung Barakhana ya Rothihu Tetseo, IPS, Commissioner of Police ajanga sponsor süa liasü.

6 buba Annual General

Meeting takok ngua agitetba atema NPROA ajanga DGP, tanishirtem aser shilem agir ajak dang pelar aser tarutsü anogotem nung iba amala sentong agidang mapa nungi anisüngzüka alirtem arua adentsü ayongzüker, ta sangdong ajanga ashi.

Maneni mapa nungi anener aliba Nagaland Police officer tem dang Association nung tenüng züluktsü ayongzüka liasü.

Züngsemtemi NPROA nung tenüng züluktsü atema NPROA indang tongti zülur, T Chaya Angami, Retd. NPS (+919612177166) aser press secretary Nriilo Himb, Retd. NPS (+919862775617) den tongtepratepsü metetdaksü.

Security Forces temi state nung maparen balala inyak

Dimapur, Mongputeni/Oct. 26 (TYO): HQ IGAR (North) kübok Assam Rifles, Jalukie Battalion ajanga Government High School Athibung, Athibung Town, Peren District den lungjemer "Azadi Ka Amrit Mahotsav" nung shilem ka ama October 25, 2021 nü mürekmejuba sentong ka agia liasü.

Iba sentong nung security forces aser kaketshirtem lungkemer anogoshi nisung ka takum nung mürekmejuba kota tongtipang, ta asüba indang awareness agüja liasü.

Iba sentong nung kaketshir tebur 69, tetsür 30 aser tesayur 13 tejangraba tulu nung dena liasü.

HQ IGAR (North) kübok Assam Rifles, Jalukie Battalion ajanga Government High School Athibung, Athibung Town, Peren District den lungjemer "Azadi Ka Amrit Mahotsav" nung shilem ka ama October 25, 2021 nü mürekmejuba sentong ka agia liasü.

Iba sentong nung security forces aser kaketshirtem lungkemer anogoshi nisung ka takum nung mürekmejuba kota tongtipang, ta asüba indang awareness agüja liasü.

Swachh Bharat Abhiyan nükjidong tongtetsü mechi iba sentong ya ayongzüka liasü. Iba drive ya ajanga lanurtem aser nüburtem molungjang nung khuret angatetba molungsentü aiddaksü.

Iba den külemi COVID-19 cases tali akuma nungi jenbua alitsü atema tesayuba agüja liasü.

Security forces temi iba ama mapa tajung inyakba atema yangji alirtem aser administration ajanga pelaba lemsatepa liasü.

ATMA Kohima ajanga ninang metsütsü training agütsü



Dimapur, Mongputeni/Oct. 26 (TYO): ATMA Kohima district aser SAMETI & MANGE Hyderabad lungjemer Kezoma Village, Kohima nung ninang metsütsü atema Skill Training of Rural Youth (STRY) ka October 18-23, 2021 anogotem agia liasü.

Yimdak yimtsüngtem nung aluyimba tsütsü sempet balala nung ajemdaker training agütsütsü nükjidong nung iba training sentong ya ayongzüka liasü.

Technical session marudang iba training nung adener nem STRY sentong indang rateta shia liasü.

Iba training nung technical session mapang Dy.PD (ATMA), Kohima, Dr. Keviu Shuya aser Dy.PD (ATMA) Rokoshuno Angela, Kohima na shisalen sayur liasü.

Sentong nung Honey Bee Farm School tesayur, Mima, Suse Khamo-i ninang metsüngba mapang ajangshibatem lemsatep, koba pai

2009 küm tenzüka liasü aser ninang tesepe yanglutsü yimyatem sayua liasü.

Pai yanglua amshiba aser sayuba ninang tesepe ya anepalutsü tezupaba aser ninang mojitzü tali aiter, ta pai ashi aser pei takum liyonga aotsü atema ninang metsüba nung temolung agütsütsü ajungshi, kechiaser Nagaland nung adokba ninang mojitzü ya nüburtemi raktepa bushir, ta ashi.

Iba training sentong ajanga nisung 21 ajangzüka liasü

Mon nung Mission Corona Vijay tenzükogo

Dimapur, Mongputeni/Oct. 26 (TYO): Deputy Commissioner, Mon indang Conference Hall nung October 25, 2021 nü sentong ka agia Country Director, American India Foundation (AIF), Mathew Joseph-i "Mission Corona Vijay" semzüksü, kong Director Program, Public Health- American Indian Foundation, Dr. Mahesh Srinivas; Deputy Commissioner, Mon Thavaseelan K, IAS; Additional Superintendent of Police; District Hospital Mon nungi ketdangsürtem aser staff tem, Chief Medical Officer, Mon nungi aser lokti balala nungi lenirtem dena liasü.

Mission Corona Vijay mesüra The First Million ya mela-mela timtem ajurutsü tia nung alirtem aser tepetzük jenjang nung alir nem COVID-19 mozü agütsütsü nükjidong nung AIF ajanga tenzükba sentong ka lir.

Mata-mabensar, tesem ka nungi tesem ka nung aayanga jajartem, yimtung nung yokya-yokchirtem, tribal nisungtem aser unorganised sector nung inyakba tetsürtem ya vulnerable groups ama jangjateta lir.

Iba Campaign ya District

Administration den lungjemer lokti tentet balala, aser kasa wadang nung inyakba NGOs teyari nung mapa kuma inyaker.

Mon District nung iba campaign ya District Administration, Mon aser Prodigals Home, Dimapur lungjemer inyaktsü. Iba campaign atema North East ajunga nungi Mon District ya mezüngbuba shimteta liasü.

Iba sentong nung Joseph Hapwang, District Coordinator, Prodigals Home, Mon menden liasü. COVID-19 tashidak prokshia aoba azüoktsü atema vaccine agitsü kanga tongtipang ta angatetdaksütsü aser COVID-19 mozü agitsü mechi aayangi motetba tebilemstü malitsü atema iba campaign ya tenzük, ta Joseph Mathew-i ashi.

Deputy Commissioner, Mon ajanga sentong nung o tatsüka jembidang American India Foundation ajanga mapa tajung inyakba asoshi pelaba lemsatep aser COVID-19 tashidak wara sülena maneni yaritsü mepishia liasü. Project Director, Prodigals Home, K Sani ajanga melepzüng o jembia iba sentong tembanga liasü.

Kohima nung lanurtem nem ak metsütsü training agütsü



Dimapur, Mongputeni/Oct. 26 (TYO): ATMA Kohima ajanga State Agricultural Management & Extension Training Institute (SAMETI) Nagaland aser Ministry of Agriculture and Farmers' Welfare, India indang National Mission on Agricultural Extension Technology (NMAET) indang Sub-Mission on Agriculture Extension (SMAE) kübok National Institute of Agricultural Extension Management (MANAGE) lungjemer DAO conference hall, Kohima nung October 4-9, 2021 anogotem nung "Piggery Rearing & Management" indang Skill Training of Rural Youth (STRY) sentong ayongzüka liasü.

Iba training sentong nung shisalen sayur ya Dy. Director, CVO, Kohima, Dr. Ketholenuo

Metha; BTM Tseminyu Block, Dr. Vibeilie Keretsu aser Dy.PD (ATMA), Kohima, Dr. Keviu Shuya nungertem liasü.

Training nungya Introduction on Piggery, Types of Pig breeds, Piggery rearing management, ak metsüba nung rongsen ketdangsüba aser technology balala amshiba indang jembia liasü.

Training nung adenertem atema sensaksem aser onük tanaben lepa repringshiba mapang liasü aser training tatami kulizüng agüja liasü.

Iba sentong nung Dy.PD (ATMA), Kohima, Rokoshuno Angela menden liasü aser ATM ATMA Kohima Block, Rokuotuono Phira ajanga melepzüng o jembia liasü. Iba training nung lanir 18 arua dena liasü.

Mokokchung Unit Private School Association lokti senden menogo



Dimapur, Mongputeni/Oct. 26 (TYO): Mokokchung Unit Private School Association pur lokti senden October 26, 2021 nü Hotel Metsuben, Mokokchung nung mena liasü, ta sangdong ka ajanga ashi.

Iba senden nung school 13

nungi proprietor aser principal tem arua dena liasü. Senden nung onük balala jembia aser kati ka yaritepa association tashi itshtitsü atema jembia liasü.

Iba senden nung Fr. John PM menela Dr. Anungla Aier ya association tir shima liasü.

Jyotiraditya Scindia-i Shillong-Dibrugarh tayimtsü tenzüksü



Union civil aviation minister Jyotiraditya M. Scindia-i Shillong-Dibrugarh route nung mezüngbuba tayimtsü tenzüksüba sentong nung tangokba noksa nung angur.

Guwahati, October 26, 2021

(Agencies): Union civil aviation minister Jyotiraditya M. Scindia-i Shillong-Dibrugarh route nung mezüngbuba tayimtsü tenzüksüo.

Iba ya Regional Connectivity Scheme - UDAN kübok tenzük.

Online ajanga agiba sentong nung MoS for Civil Aviation, General (retired) VK Singh aser Secretary, Ministry of Civil Aviation (MoCA) Rajiv Bansal na aden.

Sentong nungsa Meghalaya chief minister Conard Sangma, his deputy Prestone Tynsong, Lok Sabha MP Vincent H Pala, Rajya Sabha MP Dr. Wanweiroy Kharlukhi, transport minister Dasakhia Lamare aser public works department (buildings) minister Sanbor Shullai nungentem aden.

"Shillong ya tenem kolaklen aliba tesem ka lir aser alima nung tzunglu aruba tesem rongnung ka lir. Iba ya linük atema dang masü saka alima ajunga atema tongtipang lir. Shillong dang Scotland of East ta ajar" ta Union minister Scindia-i ashi.

"Meghalaya tobur ajunga ajanga alima tesem ajaklen nungi tourist tem atsür arur" ta pai ashi.

"2014 küm Northeast nung airports 6 dang liasü saka 2021 nung airports 15 kümogo. Küm 7 tsungda asenoki iba nukjidong tongtetogo" ta Scindia-i metetdaksü.

"Iba ya tetenzüker dang aser onoki Northeast nung interstate & intrastate connectivity tajungba kümdaktsüsü. Flight connectivity ajungketba dang masü saka onoki infrastructure

ajungkettsü aser helicopter services tajungba kümdaktsüsü" ta paisa ashi.

"Onoki Northeast nung Heli services ajungkettsü atema Helicopter policy tenzükogo. Linük kübok tesem balala nungi onoki nisungtem Northeast-i anir arutsü" ta Scindia-isa ashi.

Meghalaya nung Shillong aser Upper Assam nung Dibrugarh tsungda nisungtemi ghonda 12 agia senzür saka tangbo tayimtsü ajanga minute 75 dang agitsü.

UDAN 4 bidding maparen nung Shillong-Dibrugarh route ya airline M/s Indigo nem lezmüksü.

UDAN scheme kübok tang tashi nung routes 389 aser airports 62 (including 5 heliports and 2 water aerodromes) tashi lapokogo.

Nisungtemi oshi atema mangatettep madoktsüla: CM Sarma

Guwahati, October 26, 2021

(Agencies): Assam nung oshi atema ashishitepba mapang ka nung Chief Minister Himanta Biswa Sarma-ibo oshi ajanga nübortem longjemdaksür ta shiogo.

Thowra nung election rally ka nung jembidang Chief Minister Sarma-i oshi ajanga nübortem longjemdaksür aser iba atema mangatettep kecha malitsüla ta ashi.

Assembly by-election nung iba constituency nungi Congress toktsür BJP nung adenba Sushanta Borgohain tokteper.

Cachar district nung Assamese oshi ajanga züluba hoarding ka sensamasatsüba atema mejashila ta Sarma-i ashi.

"Jal Jivan Mission" indang hoarding ayuba atema Barak

Democratic Front (BDF) aser All Bengali Youth and Students' Organisation (ABYSO)-i anir telok balalai lungkak ait.

Iba inyakyim mangyanga nisung kari Guwahati nung Bengali oshi agi züluba signboard sensatsü.

"Asenoki India aser Assam longjemtsü atema inyaksüla. Asenoki Brahmaputra Valley mesüra Barak Valley nung alirtem temolung meyirutsüsü bilema inyaksangshitsüla" ta CM Sarma-i metetdaksü.

"Nisung kari tanga kin kar temolung yirutsüra, iba ajanga kintem tsungda mangatettep adokdaksüsü" ta pai ashi.

Brahmaputra Valley nung aibelena Bengali oshi nung textbook ka adokra mesüra Barak Valley nung Assamese

oshi nung textbook adokra nisungtemi mapa tamajung meinyaktsüla, ta paisa shisem.

"Oshi ajanga nisungtem longjemdaksür, yimjung aser tensa süngjemdaksür aser oshi nung mangatettep ajanga nübortem tsungda telemsa adokdaksür" ta Sarma-isa metetdaksü.

Assamese shisashir Nagen Saikia-i Barak Valley balaka razüka aotsü ayongzükba atema osangbenertemi asungdangdang Chief Minister-i iba atema melangzüksüsü ta ashi.

Cachar nung atalokba sülen Sahitya Academy Award angur aser Asom Sahitya Sabha taoba president Saikia-i Assam nung tensa süngjema ayutsü atema Barak Valley balaka razüka aotsü tibilemba ka lemsatepogo.

Assam nung Rs 2 lakh yong kinungtsü yokdok

Margherita, October 26, 2021

(Agencies): Assam kübok Tinsukia district nung alir tetsür ka küm ana tejaklen la kinungboi yokdokba kidangi meyipa aruogo.

Tinsukia nung alir tetsürla ya Adaam Prema (32) den kibong kümier liasü.

Küm ana tejakdang Prema-i Kuwait (UAE) nung la Rs 2 lakhs atema yokdok ta tetsürlai

ashi.

La kinungboi mapa tamajung inyaker ka aser Human Trafficking Network Gang nung shilem agir. Pai tanur aser aser tetsür aika state aser linük aika dangi yokogo, ta laisa metetdaksü.

"Kü kinungboi asüba mesüra taküm aliba atema mebilemstür. Pai sen atema dang bilemer. Pai ozü jabaso

yokdoktsü merang" ta laisa ashi.

"Küboba Adaam Prema-i Rs 40,000 nungi Rs 50,000 ajanga nisung ayoktsü tenangzüktep yanglu aser state o linük balala nem Rs 1 lakh agi yokdok" ta laisa shisem.

Tetsürla police tsungdang ken o mebenok lir saka lai media dang la yokdokba osang lemsatep.

Piles Anepaluba - H. Umar Chesam dang alakteta pelaba metetdaksür. Piles, Fistullah, Gastric, Sinus aser Tonsil-Athjma agi ni kangshia liasü aser Rectum nungi azü alu dang mapang talangka item timtem nungi junga taneptsü mangu. Ajisua, tang H. Umar Chesam contact no. 9863758600 / 8416087414 National awardee H. Umar Chesam Address: Burma Camp 2nd Police point opp. tetuyuba nung anidaka surgery kecha magii (non-surgical) anepalur anogo ishika tsungda ni taneptsü ngua liasü aser iba sülen tanü tashi kü temang nung timtem kecha mali. Time: 9 AM - 5 PM Yours sincerely - B. Angami Add: Kohima P. Khel



Happy Birthday

Tenüng : Jaden
 Tasoba küm : 27th October 2020
 Küm : 1year(27th Oct 2021)
 Talidak : Dimapur
 Temeimtila baby Jaden, Na küm ka (1)ajungba temeim salem abener. Tsüngremi JADEN maneni pa taochi temeim nung len aniangni. Teyanglur-i arishi aser anema aliba temoatsu agujangma ta aji onok sarasadem.
 Happy Birthday baby JADEN
 ~ Oden, Moli, tantsü & tanubo




Happy Birthday baby Jaten. Tsüngremi baby Jaten nem arishi talang moajang.
 ~ From, Oja Naro and Oba Mar Aier

BJP lennir Ram Madhav-i Governor Malik anema jembidi

Guwahati, October 26, 2021

(Agencies): Satya Pal Malik-i Jammu & Kashmir nung Governor inyakdang mapa inyakba bushisüngdangtsü atema BJP lennir tejen Ram Madhav-i Deobarnü takhangba agütsüo.

Pa Governor inyakdang 'Ambani' aser 'RSS functionary' ka indang file agizüksü atema süpokrem agütsüsü nangzük ta October 17 nü Malik-i ashiba sülen Ram Madhav-i iba takhangba agütsüo.

Malik ya tang Meghalaya Governor inyaker. Pai August 2018 nungi October 2019 tashi Jammu & Kashmir nung Governor inyaka liasü.

Madhav-i Jammu & Kashmir indang BJP in-charge inyaka liasü aser pai Deobarnü Rajkot nung osangbener den

jembidang iba olen metetdaksü. Madhav-i "The Hindutva Paradigm" kaket ajungkettsü atema Rajkot semdang.

Madhav ya Rashtriya Swayamsevak Sangh (RSS) indang national executive member lir.

"Meghalaya Governor Satya Pal Malik-i J&K nung kü tenüng nung file ka liasü ta tai togloktsüo. Iba atema süpokrem agütsüba indang jembio" ta Madhav-i ashi.

"Ibaji tiyazü lir. Kü tenüng nung mesüra ni pusema nungitba file kecha mali" ta paisa ashi.

"Satya Pal Malik-i Governor inyakba mapang file tem agizükba ajak bushisüngdang südaktsünür. Pai file ana magizük ta ashir. Kechiba itemji magizük?" ta Madhav-isa metedaktsü.

Manipur nung KNF (N) züngsem 3 apu



Guwahati, October 26, 2021

(Agencies): Assam Rifles aser Manipur police telok kati Imphal West district nung Kuki National Front (Nehlung) züngsem asem tashi puogo.

Kangpokpi district kübok B Gammom village nung civilian pezü tepsetba nung par pezüia shilem agi ta tai tonglokja lir.

"KNF Chairman, James Kipgen aser Vice-Chairman Mangsat Haokip na tetuyuba kübok parnoki civilian tepsetba nung shilem agiba nangzükogo" ta Imphal West SP, Dr. S Ibomcha-i ashi.

Parnokisa tashiyim agi sen saruba, nisung pur aoba aser tanga mapatem inyakogo, ta SP

Ibomcha Singh-isa ashi.

Police-i KNF (N) chairman aser vice-chairman dena züngsemtem aputsü atema merangdar, ta paisa metetdaksü.

Hombarnü apurtemji Seigoulun Singsit (20), Henminlun Misao (Kevin) (29) aser Hentinsheh Singsit (30) nunger lir.

Police-i parnok ket nungi 9mm Pistol with magazine, .32 pistol aser loaded magazine ngutetogo.

October 12, 2021 nü B Gammom village nung asüpila sentong ka agidang telungpurtemi arishi küm 8 tain tanur ka dena yimdaklir 4 khaset.



TIR YIMYIM YIMOBILEM (EDITORIAL)

DIMAPUR RASEMNÜ, MONGPUTENI(OCTOBER) 27, 2021

Pei adianu dang meimba

Kodang kong südirsüaka temeim ya timtem mapang nung nungdaker. Ibaji ammag nung dang tesangwa nungdakba amai lir. Aji oda, nisung dak temeim mali masü lir, saka aiben nungdakba purtem dang aikati mesayutetter. Ibaji nisung ka taküm nung tamakok tulutiba asütsü. Tanü asen meketa temeim nungdakba purtem reprangdangra, Myanmar nung sepaitemi tashiyim agi akümba government anema nokdaker asen adianutem asütsü. Myanmar lima nung yimten yimsüsürtem shimtetsü asoshi election-bo agi aser iba election nung Aung San Suu Kyi-i aniba teloki takok angu, saka parnok nem government mekümdaktsüi yimten tashi ajak Myanmar sepaitem rongnung tulutiba Senior General Min Aung Hlaing-i anir sepaitem rakzük aser parnok anema apusortem aika pua tepudak ayu aser aika tepsetogo. Iba ama tensa tia nung Myanmar nungger aika pei talidak toktsür arem nung jenoka lir. Item rongnung Mizoram tsütsü alir Mizo nungger saka Myanmar nung alirtem tetsübu agi tang tashi nung parnok nisung meyririjang terasem shi Mizoram state kübok district trok nung jenoka lir. Myanmar o Mizoram na tsüngda artsü ya kilometer 510 agi artsüdanga lir. Aji India o Myanmar na artsü. Ibaji Tiau ayong agi artsüdanga lir, anungji ayongji ajanga Myanmar nungger saka Mizoram nung aliba Mizo nungger kinunger aser adianutem rong nung Mizoram bushia arur. Tang tashi nung Myanmar nung aliba Mizo nungger meyi terasemji Mizoram nung aliba Mizo nungger temi yaritepa Tiau ayonga ajangaji rong nung anir aruagi Champhai, Lawngtlai, Siaha, Serchhip, Hnahthial aser Saitual district-tem nung tejenokdak agütsür parnok taküm nungdak ajak teperi agüja anepaludagi. Alima ajaklen tetsübutsu wara pateka ya liaka, mali ama temeim agi item ajakji nokdanga yur, kinunger adianusa süaka bendanger kümer alir nisung meyririjang paikaji pei lima aser pei yimtak anir arua anepaluba temeimji, atangji, masadangtetba temeim lir. Mizoram nungger temi Myanmar nung alir pei adianu mechi, kechi arudir arung ta lendong timtem ajak tizükteta inyakba talila mapa kaji, tang tashi center government-ibo Myanmar nungi jena arur shinga India nung jenokdaktsüsbaji memelar. Ibayongji, nisung paikaji anioka küm junga anepaluaka center government-i Mizoram government nem senjang kata teyari agüja mali . Teyari yoktsüsbajibo yutsür, tawa toang center government-i Mizoram government dang bendangertem nem tejenokdak agüja " refugee status" agütsüsbaji state aser union territory government dak tashi mali ta nenshia metetdaksüogo. Tetezü, Mizoram government-i adianu süaka Myanmar nungi bendangertem anir arua jenokdaktsüsbaji ozüng anema inyakba mapa ka asütsü ta angatetdaksür. India-i Myanmar nungger yamaji tetsübu tia nung par sepaitem ket nung reshikangshi ajuruba nguaka, mangu ama yutsüba kuliji, India-i Myanmar sepaitem den tesendaktep meraksaner, kechiyong parnok longjemer Myanmar nung Northeast India telongpurtem jenoka aliba amaker aser meshimeshia makdoktsü sentong lir. Koba kuli agi südir süang, Myanmar nung government tashi amshia tai maketba nübortem pei kidang melitetsüsa yim dena rongdokja reshikangshibaji tim masü, ibaji meimchir temeten anema inyakba mapa lir aser ano külen, iba ama pei lima nung talidak maka, pei taküm kümzüktsü asoshi tejenokdak bushia arurtem nem ken asoshi danga tejenokdak agütsütsü India government-i memulungbaji nisungi nisung anema taochi maka inyakba mapa ka asütsü. Iba ama timtem aser tenokdangba liaka, Mizoram government-i center government-i ashibaa mangai temeim mapa inyakba nungji asenoka tangazüktsü lesson tajung keta lir. Asenokbo tia ajung, tang tashi nungbo Myanmar kübok Naga nungger alidakbo Mizo nungger amaji Myanmar sepaitemi maremtetsüsabo reshikangshi masür, anungji tipdema dang lir. Ajisüaka, Mizo nung amaji Myanmar nung aliba asen adianu Naga nungger tema, pei kidang meliteti ajentsüsa aküm nungbo manger sangwa nung Longwa aser Noklak ama tesembo süngadoktsü. Aji oda, majuruli medemka, iba ama tensa tijika asenoki ajuru nunga Mizoram government-i inyakba amaji asen government-ia inyaktsü renema atatsüla. Mizoram nung Myanmar nungi aruba adianurtemji state government-i dang masü saka Young Mizo Association den Presbyterian, Baptist aser Catholic arogtemi talidak, chiyongtsü aser abensüoshi dena agüja anepaludagi. Iba ama mapatem jagi asenoka ajungshidaktsüdi.

OLEMSABANG

YANGLUSHITSÜ APUSODI:

Naga Limai Nehimia ama Lenir Nungdaker

~ Menjiwapong Jamir

Kin ka mesüra lokti kaji lenir yari dang asür. Nübur jungnyonga lenir mejungra arakita ayur aser tetsükdakba ajurur. Taila linük meimba mulungjang agi dangbo kin ya yanglushitsü tamakoktsü.

Israel kin molutetshiba nung Nehimia ya kanga tongtibang lenir ka lir. Babilon nunggeri Yirusalem BC 586 nung amak aser nisung aika par limai alar mapa inyakdaksütsü pua bener ao. Yimmakeri par lima, nübur aser Yirusalem tenla ki ajarepa raksatsü. Yimti-yimdong ajaklen tsüngdangpi konga azüngmeyaka aküm. Nüktongzü rakdangtsü ama pei sasa noktaksü tashi makaba kin ka kümdaktsü kechiaser tanüngzük ishika toktsür aobaji mokokminertem (disable purtem) aser leni maortem dang liasü. Nüburjung aser tashikarbo ajak pua bener ao. Tesülen BC 539 nung Persia chuba Cyrus-i Yihuda nungger pei limai meyipa shilangtsü temelaba agütsü nung (Ez. 1:1) parnok ishika meyipa aru (Ez. 2). Zerubabel lenisüba nung parnok Yirusalem tenla ki aser jaratem yanglushi tenzük saka tenokdangba aru nung (Ez. 4:17-24) parnok nükjidong tonga meinyatet. Tekülem asüngsashia tenzük saka yimti jara laoa aliba molutetshia noktadaksütsü makoki liasü.

Nehimia Persia nungger chuba Artazerkes kidang tongti timsür ama inyaka liasü. Saka Yirusalem aser par nübortem asoshi pa shisa amsa aser künüamati pa mulung nung iba asoshi khuret aben. Anungji kodang par adianu Hanani aser medemertem pa dangi aru (Neh. 1:2) Nehimiai jet ta par lima indang asüngdang. Kodang pai Yirusalem tajemrepba tia indang angashi pai kukua ajeb. Kin meimer ka ama par kin osang angashidang pa mulung zürep. Pa mesüngjemtet aser pa mulungi tarungba tulu ait. Pai nüksü yima kenümati bilem.

Pa akaba tashi aser shisatsü ajak agi kodaser par kin maksü nungi anitetsü iba lemangji bushi tenzük. Kin asoshi nükenbelem jenti Nehimiai agi. Pei kin asoshi pai ajang ajanga sarasadem (Neh. 1:4-11). Tatemsa chuba nungi temelaba bener pai BC 445 shi nung Yirusalem bushia aru aser yimti jara laoa aliba yanglushitsü tenzük (Neh. 2:11-3:32). Saka Nehimia asoshi tasaktiba mapaji par nübur tetsübu agi atsükoker aliba ajungmesotsüsbaji liasü. Nüburtemi tasü maiti bilem. Pei sasa pei dak temulung melemtetba tia ka, tasü maitba mulungsentsü nem meyokdaktsür alibapurtem mesotsüji mapa kanga temelabo masü liasü. Saka Nehimiai marendak. Pa den Tsüngrem dena lir ta pai metet. Pai Tsüngremi yaritsü ta tamang aka.

Telong maten aliba nübortem pai ayongden aser yimti jara raksa-a aliba yanglushitsü bangjemtep (Neh. 2:17-18). Saka kinük ajaklen nungi amokmeren aser tatalaba aru. Par sembartem Sanbalat, Tobia, Arab, Ammon aser Ashdod nungger temi parnok nungtemtsü merang. Parnoki Nehimia tilutsü. Par Tsüngrem aser par yimsü mezüngmeshitsü tenzük. Saka itemji Nehimiai tasü aittsü o aser mapa dang kümdaktsü aser kümkümshir, tepu metsükshir aramesoa mapa nung sotak (Neh. 3). Nüburtem rongnung mapalem shitak lemsar aonung-anüngdang metitemi yimti yanglushi tenzük aser tatalaba, tilutsüba, mezüngmeshi jenti aruaka parnok anogo tenem ser ana (52) nung mapa renem. Pungmang nunga mepungmangsemba mapa asangsang aküm. Pai anir nübortem benjung amung, temenen nangzüka sarasadem aser tezüngzüktepba tasen agishi. Jara yanglushi, tekülem amentetshi aser par kin asüngsashia tenzükshi. Nehimia ajanga ayak maketba kin ka tanaben taküm dangi lepa shilangdaksü.

Kin ka yanglushitetsüsa aser tezü chilar aliba nübortem akasodaktsütsüsa Nehimia dak kechi tashi liasü? Nehimia dak lenisüba sempet tajung itemi ajiteter:

1. Mangdang yur asalendong atongba: Manger-mesangwa nung takok angutsü Nehimiai memerang saka nükjidong nungi marazüi pai sentong yanglu. Pai nübortem ayongden, anepalu, ketdang asü, aser ajungshi. Tasü aitsü ajungshi aser pai mapa agi sayu.
2. Ajungmesor tajung ka: Tia nem kokdaktsür, shi, tanela aser shisatsü ajak lureper alirtem pai ajungmeso. Parnok nem mapa aser mangdang angatetdaksü. Pa sentongji arok mapa aser mangdang kümdakja pai parnok aniten.
3. Nüburtem den litetba lenir: Nehimiai nübur o pa tsüngda ongdang madoktaktsü. Noksü shilem achitsü pai memerang. Meshimejunger aser sensakertem ola pai angashi aser telemtetba tajung agütsü (Neh. 5). Tekübok aliba nütsüng-nübor dak rangloker pai lokti ani.
4. Tsüngrem tsübuba ochishir lenir: Nehimiai tetenzük nungi tatempang tashi Tsüngrem mezüng südaktsü aser Tsüngrem lenisüba pai bushi. Nüburtem dang pai Tsüngrem akhümtsübutsu aser tashi angatsü sayu. Pai ochi nung noktak, pei ajungtsü mebilem anungji nübortem pa dak temulung alem. Pai asameyangba ajak takok anguba kuli asem liasü: (i) Pa Tsüngrem akhümtsübuba nisung, (ii) pa ochishir nisung, aser (iii) pa inyakyim ajak nübortem nem metetdaksü (transparent leader).
5. Ajemaluba lenir: Konang nüngsang pai marishi. Governor menden pa nem agütsü saka pai pa jenjang mesükshi: Governor chiyungtsü pai makang aser anogoshia nübortem den mapa inyak. Pai tila kümer par nübortem mechi jeba tatok meshi.
6. Tasü tait lenir: Tsükchirtemi parnok anema apuso aser nokdang saka pai masetshi-i noktak. Tetsübu tia nungi pai nübortem kümzük aser anisüngzüka lidaktsü.
7. Pai ajak inyaktsü memerang: Pai mapalem shitak lemezükja nübortem ajaki pei dak aketba sempet tajungtiba agi shilem agidaktsü. Nisung ajak dak nungi tajungtiba agiteta mapa nung züngok. Nisung shia dak kechi sempet liasü ibaji pai metetsü merang aser iba yariji mapa lemezüktsü. Pai shinga mezüngdok anungji nisung ajaki pei tajungtiba agütsütsü merangtep. Nübur teyari meli-i Nehimiai mapa takok ngua meinyaktetla.
8. Mapa agi aniba lenir: Nehimiai "Inyakang" ta ashiba lenir ka masü saka "Inyakdi" ta nübortem ayongzükba lenir ka liasü. Teinyaktsü mapa ajitetdang pai tangar dak meimla. Pai tangar mata. Tangar dang inyaktsü mashidang pai tamasa teka amuoka inyak.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazüngerü angateta agitsü mepishir

Karnataka nung Khristanemi anti-conversion ozüng anema longkak ait



October 25, 2021 nü Karnataka kübok Hubballi nung Khristanemi linük nung Khristanem anema inyakba aser state nung anti-conversion ozüng benoktsü aliba anema longkak aيتدang tangokba noksa nung angur. Iba sentong nung Khristanem dang masü saka Secretary of the Alliance Praveen Nadakattin, HDMC councillors Doreraj Manikuntla, Suvarna Kalkuntla, taoba mapang councillor Sudha Manikuntla aser Congress lenir Anilkumar Patil nungeria shilem agiogo.

Hubballi, Mongputeni/October 26 (Agencies): Karnataka nung Khristanem anema inyakba aser anti-conversion ozüng ka benoktsü aliba anema Hombarnü Karnataka kübok Hubballi nung Khristan aika adenshia longkak aitogo.

Pastor tem leniba nung Khristan noklang aika adenshia Hubballi nung Khristanem anema inyakba aitsüba den külemi state nung anti-conversion ozüng mebenoktsü atema parnokki takhangba agütsü.

Khristanemi Gadag Road nung aliba St. Peter's Arogo Tenla ki nungi tenzüka longkak aita jaja aser Kittur Chennamma Circle atongba sülen longkak aitba sentong tatsüka agi. Iba sülen parnokki Mini Vidhana Soudha tashi ao aser anti-conversion ozüng anema yimiyim ayima liasü.

Iba sentong nung jembidang Dharwad District Christian Pastors & Leaders' Alliance for

Peace March Tir, Sunil Mahade-i, Khristanemi tangartem kangshia tamangba yimsü meyipdaksür, ta Khristanem nem tai tongloktsür, saka parnokki kuli magütsüteter, ta ashi.

"Onoka India nunger aser onoki linük temzüng kübok alir, anungji kuli makai onok nem tai metongloktsüsüla aser onok anema meinyaktsüla," ta paisa ashi.

State sorkari ozüng alema lapokba Arogotem survey agitsü lemtetba dak sendakba nung pai, iba ya Khristanem anema inyaktsü nükjidong nung lemtetba lir, ta ashi.

Lokti tentet kar, ketdangertem aser yimtenren lenir kari Khristanem nokdangtsü meranger, ta shia Pastor Cedric Jacob-i, "Onok ya Yisu sülen anidakertem lir. Onoki Pa tesayubatem nung ajemdaker sayutsngir, ajisüaka shinga nem timtem magütsür. Onoki loktiliba ajungtsü atema dang inyaker. Onoki yi

jemertem taküm melenshia taküm tasen tenzütsü atema ajungshir," ta ashi.

Longkak aitba sentong nungji Secretary of the Alliance Praveen Nadakattin, HDMC councillors Doreraj Manikuntla, Suvarna Kalkuntla, taoba mapang councillor Sudha Manikuntla aser Congress lenir Anilkumar Patil nungeria shilem agia aden.

Khristanemisa aibelenertem aputsü atema takhangba agütsü.

Longkak aiterem rongnung Belagavi, Haveri, Gadag, Mysuru aser Mangaluru nungi MLA tem aser Telangana Rashtriya Kraista Parishat nungi office ketdangpurtema liasü.

Longkak aitba ajanga Lamington Road aser Chennamma Circle nung gari senzüsempo nung timtem adoka liasü. Taoba Amongnü Hubballi nung Khristanem anema inyakba dak sendakba nung Khristanemi Hindutva telok kar anema ken o benokogo.

Haiti nung puer aoba missionary 17 tepsettsü amokmerener

October 26, 2021: Tawa Haiti linük nung 400 Mawozo teloki puer aoba Khristan missionary tem tepsettsü amokmerenba sülen missionary kinüngertemi iba telok dang parnok dang tai tokang aser chiokang ta mepishidar.

400 Mawozo telok nung tongti lenir, Wilson Joseph-i missionary 17 chiochtsü atema nisung shia atema sen million kaka agüjang mesüra parnok ajak khasettsü, ta amokmerenogo.

October 16, 2021 nü 400 Mawozo-i Canada nunger ka aser America nunger 16 puer ao; missionary temji Christian Aid Ministries nung inyakertem lir.

Missionary tem chiochtsü atema Haiti aser US ketangsertemi Mawozo telok

den tang tejembidak lir, ajisüaka parnok tsüngda jembiba agi Wilson Joseph melung masür.

Taoba Brihostibarnü Joseph-i, "Ni atangji ya ashir, ni akhangba mataloktsüra America nunger kolak shia nung injang kaka khaloktsütsü," ta amokmerenogo.

Joseph-isa Haiti Ato kilonser, Ariel Henry aser Haiti National Police tongti, Leon Charles nata amokmerenogo.

Brihostibarnü Ato kilonser office ajanga, Charles-i police tongti menden nungi anenogo aser pa melen Frantz Elbe shimogo, ta metetdaksü.

Missionary tem puer aoba dak sendakba nung osangbenertem den jembidang U.S. Secretary of State, Antony Blinken-i, "Administration-i iba

tebilemtsü atema inyakdar. State Department nungi team ka Haiti linüki yokogo aser parnokki FBI den longjemer inyakba den külemi Haiti National Police, missionary tem züngsemba Arogo aser Haiti sorkar den maneni tongtepratepa inyakdar. Iba tebilemtsü akoktsü atema onoki akoba tashi inyaktsü," ta metetdaksüogo.

Missionary tem puer aoba sülen Haiti nung nüburtemi parnok ajak chiokang ta takhangba agüja longkak aitar. Taoba hopta Port-au-Prince nungbo school aser colleges anogo aika shibanga liasü.

Taküm July ita nung Haiti Tir, Jovenel Moïse tepsetba sülen security tensa kanga mejungi kümer aliba mapang ka nung missionary tem puer ao.

ANO GO ABEN TSÜNGREM DEN

Onoki Akok

Aser Pai parnok dang jembitsü tenzü. Tanü iba lai nenok narong nung atalokogo. Luke 4:21

Yisu Satani arem nung atidanger külen, Pa Galili aru aser Synagogue nung sayutsüngitsü tenzü. Nazareth, Pa alidak, Pai Isaia kaket nungi azüng, "Kibuba Tanela Kü dak lir..." (Luke 4:18). Idangji Pai ashi, "Tanü iba Laishiba nenok dak atalokoko." Aikati Pai Tsüngrem atalar ta bilem aser tepsettsü merang, saka Tsüngremi Pa kümzü. Pa tenzüka mapa ajak agi kechi liasü? Ozüng aser ainkar shin O indaktsütsü Pa maru, saka itemji atalokdaksütsü Pa aru (Mathi 5:17).

Mezüng putu nung nübur ket nung Tejen Lai aser ainkartem kaket dang liasü. Tanü asenok ket nung kaket 27 lir, koba dang Tasen Lai ta ajar. Idakji ataloktsü ashibatem aika lir aser itemjia ataloktsü. Tejen Lai mapang aser tanüa, Tsüngremi asenok koma lidaktsüner iba tesayubaji lir. Ozüng aser ainkartem O aser Yisu, Paul, Peter aser tangartemi taküm koda talubosa alitsü sayuba angur. Saka tatem anogo nung kechi ataloktsü Tsüngremi asenok dang tejangja sayur. Yisu, Timtemba Kilir, shin O atalokdaksütsü mezüngbuba aru, aser tanaben Pai kechi ataloktsü ashi aji atalokdaksütsü arutsü. Iba anogoji yakta arudagi. Na renema lir ma ?

O Tsüngrem, Nai taküm nangzükba asoshi ni Ne tenüng kanga asanger. Temenen lima den Ne tenangzükba aser taküm mesüra tashi angutsü nangzükba lemsateptsü yariang. Amen.

Libya linük nung kiralongrartemi Coptic Khristan 17 puer ao

October 26, 2021: Libya linük atema onoki Egypt Foreign nung Egypt nunger Coptic Ministry den-a tongtepratepa Khristan 17 samaogo, saka jembidar," ta metetdaksü.

Libya linük nung Khristanem kanga reshikangshir, saka metetsümonga Coptic Khristanemi mapa bushitsü atema Libya-i aoer.

Osangbener den jembidang Coptic Khristan kati, "Libya nung aliba dang nungibo tasüba tajungba asütsü ta onoki meteta lir, ajisüaka onok atema tanga lenmang mali. Yangi rongsenkettsüng jenjang majungba agi nisung aikati Libya-i aoer. Egypt nung mapa mangur mesüra sen mangur. Libya nung talisa Khristanemi lendong ajurutsü ta onoki meteta dang lir, ajisüaka aayangtsü atema iba linük jagi aotsüsa akümer," ta ashi.

2015 küm Libya nung IS kiralongrartemi Coptic Khristan 21 tepsetba sülen küm ana lir sülen ang 2017 küm Libya interior ministry-i Coptic Khristan 21 aremba leper nguteta liasü.

"Tekolaktemji temang den balala liasü aser sentsü temeremso süoshi semer liasü. Parnok ajak teka tesülen plastic lisü agi alener liasü," ta tamalen ministry-i metetdakja liasü.

IS teloki December 2014 nungi January 2015 tsüngda Libya nung Coptic Khristan 21 apuba sülen 2015 küm February 15 nü parnok tekolak tangzuka tepsetba video ka saya. Tripoli anasa tzüküm ka nung Khristan 21 prongla tepseta liasü.

OLONG PAITEP # 5978

1			2			3		4		
					5					
		6								
							7			
		8								
9										10
				11		12				
13										
14										
						15				

TIPILEN		LANGTSÜNGLEN	
1. Chiyungtsü oksa	- (5)	1. An tetsü	- (5)
3. Tatalokbatem	- (5)	2. Juzüa senzüba shiruru	- (7)
5. Tama	- (6)	3. Tamendakdak	- (4)
6. Pei meyong aküm	- (3)	4. Tiak-asang	- (6)
7. _ _ _ _ bang	- (4)	7. Tasa	- (7)
8. Kinungpurtem	- (7)	8. Süngjang telung nung aliba	- (6)
9. Nokdak masü	- (4)	10. Ibai masü	- (5)
12. _ _ _ _ la	- (3)	11. Ano mamen	- (4)
13. Ochi masü	- (6)		
14. Yagi Sü ataker	- (5)		
15. Temadok	- (5)		

OLONG PAITEP # 5977 TELANGZÜBA

TIPILEN :	LANGTSÜNGLEN :
1. Semtu, 3. Lepko, 5. Bilem, 8. Ulu,	1. Sayu, 2. Teb, 4. Kimong, 6. Lungkak,
10. Tsünpang, 11. Tesangwa,	7. Milak, 9. Zünga, 10. Temopu,
13. Aoksa, 15. Putir, 16. Yipru.	12. Walu, 14. Ali.



ALOKBA O TENZÜKER NA SENSAXSEMER :

Alokba : Ohhoi... Oko, tanepbo nü den nungdak kar ashitsü arur ako yah!

Tenzüker : Alokba koda! Kechi nungdak, arua menangma.

Alokba : Oko nah! Asenok Arogotem ya, joko sapisaru ya kangabo mopulotsüla, asenoka agütsüba nung shilem agiang, Arogo atema kibong shia box yutsüba yaah joko anentsüla, asen Ao Arogotem bo ang ta masü, kwang ta dang asüba yimya yah melenshitsu, tangar joko kodaki aotsü ariteper, asenokbo kwang, kwang ta senzudang, kodak süngküm shibangadoker alitsü, anungji nah! Na nokdaka alidang ya, sapisaruba yimya ya melenshiang, temolunger tenla agiah Tsüngremer wadang peria inyaktettsü.

Tenzüker : Alokba, Okolaia tanepang angateter, na aruba atema pelar, ni onok tenzüker menden nung suoka jembidangtsü. Taruba küm nungibo sapisaru ya anentsü.

Alokba : waoh... Tangatet Tenzüker.

~ Lilir : WhatsApp

TANÜBO NAI LANGZÜANG

Q. Koba tesem nung 16buba G-20 Summit agitsü renema lir?
 A.Paris B.Rome C.USA D.UK

===== (Taruba adok nung onoki langzüsü)

YASHI ADOK TELANGZÜBA : Nano Biotechnology Research Centre

AO OSHI ANGAZÜKDAK:
TANÜ ANGAZÜKTSÜBA OJANG

Lemshi
 (v) lemsaa agütsü (distribute)
 * Kütsüi züsentetba aonsutsü kiyonger nem **lemshia** agütsü.

Lemta
 (v) tenüktelen mejungi küma adok (cripple)
 * Gari lendong nung kü tsüng yiruba agi ni **telemta** aküm.

Happy Birthday

Tenüng - JADEN
 Tasoba anogo - 27th October 2020
 Talidak - Mangimen, Dimapur
 Happy 1st Birthday JADEN

Tsüngremi JADEN küm ka(1) moatsüba asoshi Teyanglur tushir. Na mezüngtangtetba Yisu temeim nung arishi talang aser anema aliba temoatsü nung indakjang ta tanü na asoba anogo nung Tsüngrem dak mepishitsür. JADEN Tsüngremi moajang.

~ Temeim Otsü & Obu

NAI-A YA METETTER MA

TAOBA MAPANG OCTOBER 27 NÜ ATALOKBA KAR:

1676 -	Poland aser Turkey nati 'Peace of Warsaw' sign asü.
1682 -	William Penn ajanga Philadelphia, Pennsylvania ngutet.
1775 -	US Navy-i Continental Navy tentet.
1927 -	Nijmegen nung Queen Wilhelmina-i Meuse-Waal Canal lapok.
1954 -	President Eisenhower-i South Vietnam Prime Minister Ngô ?inh Di?m nem teyari agütsü.
1954 -	ABC nung Walt Disney indang mezüngbuba TV show "Disneyland" sayu.
1958 -	Pakistan indang President ama General Ayub Khan-i Iskander Mirza melenzük.
1962 -	Nevada Test Site nung US-i nuclear tendang.
1966 -	Lop Nor, PRC nung China-i nuclear tendang.
1969 -	John Tinbergen nem Nobel Prize (Economics) agütsü.
1977 -	NASA-i space vehicle S-200 khaketa yok.
1981 -	US nung Ringo Starr-i "Wrack My Brain" ken saya.
1986 -	Paul McCartney-i "Pretty Little Head" ken saya.

SUDOKU # 6019 TELANGZÜBA # 6018

6	7	9	3						4	2	9	3	7	6	1	8	5
4			7	9	2			6	8	3	6	4	1	5	7	9	2
		1	5	8	6			4	5	7	1	9	2	8	3	4	6
		8							6	9	8	7	5	3	2	1	4
		3	1	6	8	2	9	7	3	4	7	1	8	2	5	6	9
2		7		5	9	3			2	1	5	6	9	4	8	7	3
						9			9	8	3	5	4	7	6	2	1
8	5		9	2	1				7	5	4	2	6	1	9	3	8
9	3			4	7	5	8	2	1	6	2	8	3	9	4	5	7

OJANG LUTEP # 5564

ZÜJATANGK :

MAATE :

ARTEMB :

MERAYI :

GIJA :

EN :

APMA :

TAKBSHIA :

BONUNG :

MEITSYARÜ :

OJANG LUTEP TELANGZÜBA # 5563

TANGAR AKABA AGINÜA REPRANGBAJI TAKÜM NUNG SHISABULU TALILA BENDENLOKER DANG

TAN HOPTA ATEMA - KOMA SÜLA ?

Q. Naga nunger yimten tebilemtsü ken o ya India-i, Naga nunger tanga teloktem yutsür, NNPGs telok den dang latet nunga koma süla ?

Congress-i Nov 14 nü Jan Jagran Abhiyan sentong tenzüksü



New Delhi kübok party headquarters nung AICC General Secretaries/In-Charges aser Pradesh Congress Committee tirmen senden nung shilem agitsü atema Congress lenir Rahul Gandhi, aruba mapang tangokba noksa nung angur.

New Delhi, Mongputeni/October 26 (Agencies): Congress-i Mongolbarnü sangdong ka ajanga November 14 nü Jan Jagran Abhiyan' sentong tenzüksüba sangdongogo. Party otongdar Randeep Surjewala-i, party lenirtem senden amenba sülen iba osang sangdong liasü. Parliament Winter Session metenzük tsüngda aser state pongu nung assembly election magi tsüngda Jan Jagran Abhiyan ayongzüka agitsü. Mongolbarnü Congress lenirtem senden ka mena state pongu nung taruba election atema tasa asaogo. Party tir Sonia Gandhi-i, party lenirtem dang Congress party tashi itshtisü atema nükjidong ayutsü

ayongzüka den parnok indang jurila nükjidongtem atema minyaksü ajungshi. Laisa, policy dak sendakba nung state lenirtem ken o junga mangatetti lir ta ashiba den grassroots-level nung Congress lenirtemi tongtibang ken o tem dak sendakba nung osang mangazüki alitsü ta bilemba lemsatsep. Taoba party tir Rahul Gandhi, Congress general secretar tem, in-charge aser pradesh tir tem Mongolbarnü senden nung aden, kong party yongtsü nung tebandang adokba tebilemtsü dena sensaksemogo. "Democracy, constitution aser Congress party indang ideology kümzüka ayutsü atema

propaganda taila jangjatsü aser iba anema jenjang agitsü atema renemshir tenzüksü. Asenoki BJP/RSS indang ashikelak inyakyim anema raratsüla. Asenoki iba rara koti süra parnok teyazü tenangzükbaten nüburtem nem metetdaksütsüla," ta Sonia Gandhi-i ashi. Kasa mapang nung party nung züngsem tasen züngoksemtsü atema taruba hopta nungi inyakyim metenzük tsüngda iba senden menogo. Sonia Gandhi-isa, Uttar Pradesh, Punjab, Goa, Uttarakhand aser Manipur nung election magi tsüngda Congress züngsemtem yongtsü nung discipline aser telongjem dak rangloker inyaksüla, ta ashi.

Lakhimpur Kheri ken o nung ano nisung 2 puogo

New Delhi, Mongputeni/October 26 (Agencies): Lakhimpur Kheri nung azütokshi ken o dak sendakba nung First Information Report (FIR) tanabuba dak ajemdaker ano nisung ana puogo, ta Uttar Pradesh Police additional director general (law and order) Prashant Kumar-i Mongolbarnü ashi. Tanabuba FIR dak sendakba nung tang mezüngbuba nisung ana puogo. Police-i pua aliba nisung ana ya Gurwinder Singh aser Vichitra Singh ta jangjaogo. Iba

ita tetenzüklen Bharatiya Janata Party (BJP) züngsem ana, gari anir ka aser local osangbener ka tepsetba ken o nung ano nisung ana puogo, ta Kumar-i ashi. Mezüngbuba FIR dak ajemdaker nisung 13 pua lir. Iba tatalokba nung aluyimer pezü densema nisung ti asü. Union minister of state for home Ajay Mishra Teni indang gari kati item aluyimertem menüngseta liasü. Iba ken o nung aija alirtem rongnung tongtibaji Teni'er jabaso, Ashish Mishra lir. Deobarnü ANI sangdong ka

ajanga ashiba agi, Ashish dengue agi shiranger aser pa sorkar mozüki-i benerogo. Tang tashi nung nisung 13 pua alirtem rongnung parnok pezü taoba hopta Uttar Pradesh police aser SWAT team-i apu. BJP züngsem Sumit Jaiswal, shiba October 3 nü aluyimertem menüngsetba gari nung mena liasü, pa taoba hopta apurtem rongnung densema lir. Kasa mapang nung Uttar Pradesh police-i iba ken o mapang talangka atsülangdaksüba atema Supreme Court-i ashishiogo.

West Bengal nung gutkha, pan masala nokdang

New Delhi, Mongputeni/October 26 (Agencies): West Bengal sorkari Mongolbarnü gutkha aser moko aketba pan masala tem yanglutsü aser ayoktsü atema küm ka tenokdangba agütsüogo. State sorkar tetuyuba ya November 7 nü nungi benoka inyaksangshitsü. West Bengal indang health department sangdong ka ajanga ashiba agi, nüburtem health temulungdang yur iba telemtetba ya agiogo. Department-isa, food safety and standards act, 2006, Section 30 kübok commissioner of food safety nem state ajunga nung chiyongtsü mashika yanglutsü, bendena ayutsü aser lemshitsü mesera ayoktsü atema tenokdangba agütsütsü asoshi tashi agüja lir, ta ashi. "Food Safety and Standards Act, 2006 (Central Act 34 of 2006) clause (i) sub-section (2) section 92 nung tashi agüja aliba ama Food Safety and Standards Authority of India-i yangluba Food Safety and

Standards (Prohibition and Restrictions on Sales) Regulations 2011 dak ajemdaker moko mesera nicotine amshiba chiyongtsütem ayokba nokdang, koba health atema lendong asütsü akok," ta, commissioner of food safety, West Bengal Tapan K Rudra-i sangdong ka ajanga metetdaksü. Gutkha aser pan masala nung moko aser nicotine amshir. Item chiyongtsütem ayokba ajanga state sorkar saru nung sen aika aazüker. Ajisüaka nüburtem health temulungdang yur linük nung state aikati gutkha aser nicotine aketba tanga chiyongtsütem nokdanga arudar. Mamata Banerjee-i aniba sorkari 2019 küm mezüngbuba gutkha, betel spice aser tanga moko agi yangluba osettem nokdanga liasü. 2013 küma state sorkari West Bengal nung küm ka atema khaini, gutkha aser pan masala nokdanga liasü.



Pulwama kübok martyr's memorial nung CRPF jawan tem nem Union Home Minister Amit Shah-i aküm tetushi agütsüba noksa nung angur.

Gujarat court-i Rahul Gandhi jaok

Surat, Mongputeni/October 26 (Agencies): Surat nung okadak ka indang magistrate kati Congress lenir Rahul Gandhi dang October 29 nü okadak nokdaksü tetuyuba agütsüogo. Modi indang tenüng menüksüba ken o nung pa indang statement mangaoka ayutsü atema jaokogo. Homabrnü Chief Judicial Magistrate A N Dave-i, Gandhi dang October 29 nü pa indang statement mangaoktsü atema okadaki arutsü tetuyuba agütsüogo. Rahul Taküm July 24 nü okadak nokdakba sülen nisung tasen anati tenük kuli agütsüba dak ajemdaker pa jaokogo. Iba masüidang Gandhi 2019 küma October ita okadak nokdakago aser pai jembiba o nung aibelena mali ta shiogo. Surat nungi BJP MLA

Purnesh Modi-i, 2019 küm April ita Gandhi anema Indian Penal Code Sections 499 aser 500 dak ajemdaker ken o benok. Tashishiba nung Purnesh-i, Gandhi-i 2019 küm election atema nüboyimba mapang "kechiba auertem ajak Modi tenüng ya parnok indang surname lir," ta shia Modi tenüng jar alirtem ajak tenüng menüksüogo, ta ashi. Purnesh Modi ya tang Gujarat sorkar kübok minister ka lir aser pai road & building, transport, civil aviation, & tourism & pilgrimage development portfolio tem bener lir. Gandhi tesüsa okadak nokdakba sülen nisung anati kuli agütsüogo. Nisung ana ya ka Kolar indang electoral officer aser ka Election Commission indang video recorder lir.



Kurseong, Darjeeling nung senden ka nung shilem agitsü atema aruba mapang West Bengal Chief Minister Mamata Banerjee pusemertemi banner amer la agizükba noksa nung angur.



Lazaro Cardenas, Mexico nung Hurricane Rick aruba sülen gari ka süngdong agi nembanga aliba noksa nung angur. Iba yipru nungya mopung ghonda ka nung kilometre 55 tashi kera ona liasü. Iba yipru ya ajanga tükumlen ajungben tükumsüng adoktsü aser anentsüh alutsü akok, ta tekumdangtsü shiogo.

Egypt Tir el-Sisi-i state of emergency agienogo

Cairo, Mongputeni/Oct. 26 (Agencies): Egypt Tir Abdel Fattah el-Sisi-i linük ajungalen benoka aliba state of emergency agienba sangdongogo.

2017 küm April ita ISIL (ISIS) den sendaktepa aliba telungpur telok kati Coptic arogo tenlaki ana nung bomb pokloktsuba sülen iba mera ya agia liasü, kong nisung 40 dak tema asü aser aika yirua liasü. Egypt nung nütsüng yongsük million 100 shi aliba nung Coptic Christian ya shilem 10 shi lir.

"Region nung Egypt ya tesunep aliba linük ka kumogo, nüburtem aser sorkari ashiba angartem dang pelar," ta el-Sisi-i Hombar nikongdang Facebook

nung ashi.

"Iba yongji ni linük tesem ajungalen state of emergency asendenshitsu aliba agientsü telemteba agi," ta pai ashi.

Egypt nung activist tejangja, Hossam Bahgat-i iba telemteba pelashishia agizük aser iba ya ajanga emergency state security courts amshiba anentsü, saka ken o tulu kar nungbo mekongshitsu, ta ashi.

Egypt nung state of emergency benokba ajanga ketdangsürtemi warrant meliaka nisung apur aser ki mita bushia liasü. Freedom of speech aser lokti adenshitsu temeden constitution ajanga mela aliba agien.

Linük nung küm aika azüdokshi azüoktsü meranga arur, aser azüdokshi ya timba northern Sinai Peninsula nung ataloker saka mapang shia tesem balala nung ataloka arur.

State of emergency den sorkari 2013 küm nungi tenzüka longkak aitba nokdangba ajanga sorkar anemertem azüoktet, ta rights group temi ashir.

Muslim Brotherhood nungi El-Sisi, shibai 2013 küm democracy yimya nung shimba Tir Mohamed Morsi atsüngdok, pa ya 2014 küm nungi tir inyaka arur. Pai security ya tongtipangtiba ama züngshir aser Egypt nung political prisoner mali, ta ashir.

Mitkari Sudan sorkar atsüngdokba anema longkak aiter

Khartoum, Mongputeni/Oct. 26 (Agencies): Mitkari tashiyim amshia sorkar atsüngdokba anemertem Mongulbarnüa Sudan yimtiba, Khartoum nung adenshia longkak aiter, kong security forces temi telangzüba tajung magütsür.

Hombarnü Army General Abdel Fattah al-Burhan-i linük tesem ajunga nung state of emergency sangdong aser democracy yimya dangi melenba sorkar anentsü. Sepaitemi sorkar ketdangsürtem puogo ta osang prokshiba sülen democracy busemer nisung meyrirang aika yimti-yimtong nung adenshia liasü. Pua alirtem rongnung Ato Kilonser Abdalla Hamdok densema lir, shiba mejangjaba tesem kati anir ogo.

Hombarnü nisung tenet tepset, ta health ministry ajanga sangdong ka nung ashi. Mitkartemi internet shibangtsü, Khartoum nung aliba lenmang aser apu kar aser airport shibangtsüogo.

Sorkar atsüngdokba ajanga linük balalai aitsü aser pua alir ajunga chioktsü akhang. United Nations Security Council pur Mongulbarnü menur iba tensa indang jembitsü imlar.

Ministry of information ajanga par Facebook account nung, ministry of foreign affairs ajanga Hamdok aser par samar



Abdel Fattah al-Burhan

aliba caminet züngsemtem tang tashi mejangjaba tesem nung yua lir, ta ashi.

Sudan tensa indang tang tashi osang agitepba sorkar tentet ishika rongnung information ministry ya ka lir.

"Sudan nung aliba nüburtemi tensa ya pei yimya nung angateteptsüla aser ibaji akok tashi tekeratiba nung nisung takum melalui inyaktsü Russia teimla lir," ta Kremlin odongtar Dmitry Peskov-i osangbener senden ka nung ashi.

Television nung al-Burhan-i sangdong ka agütsüba nung Sudan ya technocratic government kati anitsü, ta ashi.

"Linük inyakyim ya temeja technocrat government kati anitsü, kong Sudan nübur tabu ajunga nungi shilem agitsü," ta mitkar leniri ashi.

Sudanese Professionals Association ajanga social media nung noksa prokshiba nung Khartoum kübok Joba street nung gari tetsüng rongdokba aser nüburtemi atsü atsüba nguogo.

General al-Burhan-i Mongulbar nikongdang 1:00 ako (par mapang) nung osangbener senden ka nung Khartoum nung aliba army headquarter nungi jembitsü, ta pa indang office nungi ketdangsür kati ashi.

Iba senden nung mitkar leniri 2023 küm July ita election magi tashi transitional government tasen ka indang metetdaksütsü imlar.

United States-ia sangdong ka nung, Sudan armed forces inyakyim tashi agi aitsür aser transitional cabinet anentsüba magizüker, ta ashi.

Ajidang masü Hamdok aser ketdangsürtem apuba aitsü aser parnok tekeratiba nung chioktsü ashi.

"Item mapa ya linük democracy dangi meyipba nung tetsükdaktsü agütsür alitsü aser Sudan tesunep nung temelenshi kati aruba ashioksür lir," ta sangdong ajanga ashi.

"Iba tensa mechi United States-i Sudan nem emergency Economic Support Funds atema sen million \$700 agütsütsü aliba soita atar aser tarutsü meratem atema asadanger," ta metetdaksü.

Myanmar-i ASEAN summit nung shilem magitsü lemtet

Kuala Lumpur, Mongputeni/October 26 (Agencies): Southeast Asian lenirtem Myanmar medeni Mongolbarnü annual summit tenzüko. Myanmar indang military yimsüsür iba senden nung shilem magidaktsütsü telemteba agiba sülen parnoki iba senden nung shilem magitsü lemtet.

Association of Southeast Asian Nations (ASEAN) ajanga Myanmar indang general tongtiba nem tenokdangba agütsüba sülen, iba jenjang agiba anemba temaitsü Myanmar-i iba senden nung shilem magir.

February ita Aung San Suu Kyi-i aniba sorkar atsüngtokba sülen Asean-i Myanmar tenüng nung summit nung General Min Aung Hlaing nem shilem magidaktsüba ya tang tashi nung tenokdangba tesashitaba asütsü.

Taküm iba senden ya Brunei nung agidar aser züngsem 10 agi kumtetba lokti tentet yagi "non-political" representative ka ama Myanmar indang diplomat, Chan Aye senden nung shilem agitsü jaok, ajüsüaka lai senden nung shilem magi, ta Indonesia foreign minister Retno

Marsudi-i Jakarta nung osangbenertem dang ashi. Marsudi-isa, tir Joko Widodo-i senden nung, Myanmar nem tenokdangba agütsütsü atema ASEAN asoshi kanga tasak liasü saka iba ya kanga nüngdaka liasü, ta ashiba metetdaksü.

ASEAN züngsemtem telung ken o nung mejushitsu atema aser arok tangatetep nung telemteba agitsü asoshi parnok tangatetba ka liaka Widodo-i ashiba agi, "parnoki ASEAN charter nung democracy, good governance, human rights aser constitutional sorkar akümtsüsuba amala tangatetbatem benoka inyaksangshitsu nüngdaker," ta Marsudi-i ashi.

"Kibong ka ama ASEAN-i Myanmar nem teyari agütsütsüla aser Indonesia-i lokti nung ajaka anisemer Myanmar nung takaratiba nung democracy amenoktsü atema imlaa atar," ta Widodo-i ashiba paisa metetdaksü.

Myanmar nung military-i sorkar atsüngba sülen linük ajunga nung longkak ait tenzüik aser item longkak aitertem ya sepaitemi tashiyim agi azüoka

liasü. Security forces-i nisung 1,200 shi tepseter alitsü ta amanger saka sorkari iba dang nungi ishiba asü ta shia arudar.

ASEAN special envoy, Erywan Yusof nem Suu Kyi aser tepuokda yua aliba lenirtem ajurdaktsütsü atema military lenirtemi temelaba magütsüba sülen Myanmar iba senden nungi shilem magir.

Thailand Ato Kilonser Prayut Chan-o-cha-i senden nung, Myanmar nung mepetmesü adokba ya regional teblemtesü bentettsü atema ASEAN tashi tendangba ka liasü, ta ashiba Thai sorkar otongdar Thanakorn Wangboonkongchana-i ashi.

Prayut-isa, Myanmar-i ASEAN dak tamang kaa Erywan nem lokti ajak ajurdaktsütsü imlaba lemsatop, kechiyong mepetmesü bentettsü atema iba ya kanga dang tongtibang inyakyim ka asütsü, ta Thanakorn-i ashi.

Coronavirus wara pokteter aliba ajanga anogo asem amentsü aliba senden ya video ajanga dang agidar, kong US Tir Joe Biden aser China aser Russia nungi lenirtem densema

alima kin balala lenirtemi shilem agitsü. 2017 küm sülen tang mezüngbuba US tir kati ASEAN summit nung shilem agitsü.

Senden nung Myanmar nung tensa tamajungba küma aoba aser tanga regional security aser rongsenketzüng nung ken o balala dak ajemdaker onük balala benoka sensak asemtsü.

ASEAN-i senden nung Min Aung Hlaing nem shilem magidaktsütsü atema tongtiba jenjang ka agir aliba mapang ka nung ASEAN Parliamentarians for Human Rights-i, Mongolbarnü bloc dang Myanmar indang opposition National Unity Government den sendakteptsü mepeshia liasü. NUG-i parnok ya 'shadow government' ka ama züngshir aser parnoki ASEAN summit nung shilem agitsü asüngdangogo.

Hombarnü US ketdangsür kati NUG lenir ana den virtual senden ka ayongzüka menogo. National security adviser Jake Sullivan-i, US-i maneni pro-democracy movement pusemtesü ta ashiba den military inyakyim ngua shisabulua bilemba lemsatop liasü.

NSCW-i Jalukie nung legal awareness sentong ayongzük

Peren, Mongputeni/October 26, 2021 (TYO): National Commission for Women (NCW) ajanga teyari agüja Nagaland State Commission for Women (NSCW) den Jalukie Town Women Welfare Organization longjemer Hokolbarnü (22.10.2021) Peren district kübok Jalukie Town nung legal awareness sentong ayonga agiogo, ta sangdong ajanga metetdaksü.

Iba sentong nung, Nagaland State Commission for Women Chairperson, Khrienuo Tachu-i, tetsür (women & girls) nem tashi agütsütsü nükjidong yur iba Commission yagi bendanga agüja inyaker, ta ashi.

Nagaland ya teburi dang semng amanga, lokti nung tekolak shimba/inyakba aser maparen balala nung tashi amba tesem ka lir, kong lokti nung Naga tsür temi ajuruba timtem talisa kibong nung balaka amshiba, telok nung mezüngokba anema nokdaksü asoshi teburtemi tongti shilem agitettsü akok, ta lai metetdaksü.

Tachu-i ashiba agi, asenoki tetsür tanur tim lenmang nung anitettsü nügdaker aser parnok nem kaket shisatsü bushiba jenjang tajung (quality education) agütsütsü, kechiyong parnoki (tetsür tanur) shisaliok tajung ngura, tesem mashi ka nung parnoki pei taküm asoshi inyaktetsü, shisatsü nung tashiita aser parnok nem agütsüba temeden metetta alitsü.

Tetsürtem 'cybercrime' lendong nungi pei sasa kümzüka alitsü asoshi entrepreneurial skills nung terenlok lidaktsütsü aser tongtibangsa tangar teyari magii pei sasa ochishia aser

meranga inyaktetba nungi peria alitsüsa tajung ajiteta inyakttsü angazütsüla, ta lai sentong nung shilem agirtem ajungshia liasü.

Laisa, lokti nung tetsürtem kümzüka ayutsü asoshi ajaki amalitepa inyakttsüla, ta ayongzük. Sentong nung adeneritem dang, laisa, lokti nung tebandang kecha makai pei tetsür aser tebur jala kasa anepalutsüla, aser item inyakyim ajak kidang/kibong nungi tenzütsüla, ta ashi.

Iba sentong nung adener rongnung tebur timba ngua, NSCW Chairperson-i pelaba metetdaksü. Kasa sentong nung, Panel Lawyer, Peren District Legal Services Authority, Italang Ramlia-i, "Legal Rights" session ketdangsiia agia liasü.

Iba sentong nung pai, Indian Constitution ajanga tetsürtem atema 'legal rights' balala, talisa 'Sexual Harassment of Women at Workplace (prevention, prohibition and redressal) Act 2013', 'Law of Maintenance of Women in India' aser 'India nung Rights available & arrested person/women' tem melaba indang telok dang metetdakja liasü.

Centre Administrator, Sakhi-One Stop Centre (OSC) Peren, Asuni-i, "Forms of Gender Based Violence; & Services of One Stop Centre" onük nung ajemdaker jembio.

Asuni-i OSC indang inyakyimtem, service balala aser item service ajangzüksü asoshi yimyattem indang tongmelang agi rasa ashi.

OSC ya lokti aser kidang/kibong nung timtem tia nung alir tetsürtem nem teyari agütsütsü aser parnok iba timtem nungi kümzüka yutsütsü; medical,

legal, psychological aser counselling densema emergency aser non-emergency access service balala agütsütsü nükjidong yur inyaker, ta Asuni-i shisem.

Asuni-isa, Women Helpline 181 indang tongtibangtem aser iba Helpline ajanga timtem nung alir tetsürtem nem teyari agütsüba indang telok dang metetdaksü.

President Chairmen Union, Jalukie, Hauneu Haika-i, "The Way Forward" indang nung ajemdaker jembio, kong melenshia aoba lima ka nung, linük nung tetsürtemi wadang balala nung shilem tulu agidar, ta pai ashi.

Lenla ajunga nung tetsürtem nem sabang kasa agütsütsüla, ta pai sentong nung adeneritem ajungshia liasü.

Haika-isa, Naga yimtenren tebilemsü nung shilem agitsü asoshi tetsür lenirtem aser tetsür nem sabang ka agütsütsüla, ta pai NSCW ajungshio. Sabang tulu nung jembitsü aser inyakttsü asoshi tetsür shia dak sempet keta lir, ta pai ashi.

Iba sentong nung, NSCW Secretary aser Social Welfare Department indang Joint Secretary, Bodeno S Colo menden liasü. Taoba mapang Jalukie Town Women Welfare Organization, President, Adai Iheilung-i tepela anküp o jembio.

Maneni, team-i Community Health Centre, Jalukie semdang aser Covid-19 mapang manemertem timi anepaluba atema iba Centre nung inyaker doctor aser nurse ajak dang pelaba metetdaksü aser team-i parnok den sensaksema liasü.

Team-isa manemer ka semdang aser la nem teyari agütsü. Kasa mapang, NSCW-i Women Police Station, Jalukie semdang aser ketdangsürtem den sensaksemogo.

Iba Commission-i OSC indang Centre Administrator aser District Administration na den külemi new DC complex, Peren nung teyangludak aliba Sakhi-One Stop Centre (OSC) semdang aser OSC indang tayongzükba balala nung parnok olemtepa liasü, ta kasa sangdong nung shia lir.

Wokha nung Sakhi-One Stop Centre lapoktsüogo

Wokha, Mongputeni/October 26, 2021 (TYO): Mongolbarnü, Commissioner & Secretary, Department of Social Welfare & Administrator, NSSWB, Sarah R. Ritse-i Dr. Motsuo Memorial District Hospital, Wokha nung Sakhi-One Stop Centre (OSC) building lapoktsüogo, ta sangdong ajanga metetdaksü.

Iba sentong nung, Ritse-i, tanü ya longjemba aser tesendaktep tajung yangluba anogo ka lir, ta ashi; aser nüburttem ajangzüksü atema amalitepa aser telongjem nung inyakttsüla ta lai Department ayongzükba liasü.

Iba Sub-Center lapoktsü asoshi meranga inyakba atema lai Wokha district dang pelaba metetdaksü aser iba buliding takok ngua renemtsü asoshi nungitta yariba atema iba maparen nung inyaker ajak dang lai pelaba shisem.

Team nem lenmang balala ajanga teyari agütsüba aser Wokha One Stop Centre ya State nung tajungtiba ka ama yangluba atema, Ritse-i Deputy Commissioner Wokha, Orenthung Lotha danga pelaba metetdaksü.

Laisa, team maparen takok ngua inyakttsü aser timtem mapang nüngdakba nüburttem

yaritetsü asoshi lokti tentettem talisa, Arogo balala aser Eloe Hoho team dang One Stop Centre nungitta yaritsü mepishio.

Kasa sentong nung, State Coordinator for State Resource Centre for Women, Nodal Agency for Sakhi-OSC, Gracy Aye-ia jembia liasü.

Nüngdakba purtem yaritsü nükjidong yur maparen balala inyakba atema, lai Wokha OSC team dang pelaba metetdaksü aser nüngdakba purtemi (tanur aser tetsürtem) pei tenüng agütsütsü asoshi ajungshia liasü, ajiasünungang pei pei timtem yari team ajanga teyari agütsütsü, ta lai ashi.

OSC mapatongtem tashiita aser takok ngua inyakttsü asoshi nüburttem ajak tajung nung iba team nungittsüla, ta lai ayongzük.

Iba sentong nung, EAC, Wokha Aloto Sohe menden liasü aser Deputy Commissioner-i telok pela agizük. Sakhi-One Stop Centre building ya lakh 48.69 shi indoka ali 1421 sqft agia yangluogo. Centre Administrator Sakhi-OSC, Wokha, Renthunglo-i tesüiba küm ana nung iba Centre ajanga achaayanga inyakba maparentem telok dang metetdaksü, ta kasa sangdong nung shia lir.

OJALA SÜR KÜM ASEM AJUNGBA BILEMTETER

Oja, iba akümüli nungi nai onok toktsür orr tanü küm asem ajunger, saka tanü tashi onok mulung mesüngjemeteter. Nü temeim aser sayutsüngi o-tem onok mulung nung teti alitsü. Onoki na menungra bilemteter.

~ Temeim Chirnurtem,
Semchirtem, aser
Kinungertem.



Asür Watisangla
(Chuchuyimlang)
Asü : 27.10.2018

SÜR KÜM KA AJUNGBA MENUNGRA BILEMTETER ASÜR MR. RENDISOBA LONGKUMER (Changtongya yimsen)

ASO :
15.02.1932



ASÜ :
27.10.2020

Oba, na akümüli nung alidang nü menüremjak tenür, tongmelang tamang, ochi o tesayuba onoki kodanga amatsü makok. Onok taküm asoshi na len sayur ka liasü. Tanü na onok den meliaka, na kibuba den lir ta onok mulung anisüngzük. Tanü onoki na bilemteta tenüngsang agüja sarasadema amonger.

Temeim Kinungtsü, Chirnur, Semchirtem
aser Kinungertem

KANGA PELAR

Adangji tajung aser taochi kü arishi tepiyong ku sulen anidaksü:
Aser ni Kibuba kidang teti alitsü. - T.Ken 23:6



Asoba: 22.12.1962 - Tasüba: 16.10.2021

Teti dang meima aliba asür **Imtikala (Chungtia)** la ajungbena akümüli wadang tembangba anogo nung, Arogo Ao Baptist Church Diphupar, Yimten, Yimer, Kiyonger, metemer, ana aser talang nungi nenok teyari rongsen, nübu den temeim nüktzü sarasadem agi onok nungita yariogo, nenok ajak dang ozü kinunger temi kanga pelaba lemsateper. Onoki lepa agütsütsü kecha mali saka nenok ajak takar Tsüngremi lepa moajang ta ozü kinunger tamang sarasadem.

Temeim Kinungbo, Chirnur aser Kinunger

Dr. Mohan-i Rotary Club Kohima semdangtsü

Kohima, Mongputeni/October 26, 2021 (TYO): District Governor, Rotary International, Dist-3240, Rtn. Dr. Mohan S Konwar-i Hokolbarnü (29.10.2021) Rotary Club Kohima semdangtsü terenemba lir, ta sangdong ajanga metetdaksü.

Hokolbar anepdang, District Governor Rtn. Dr. Mohan S Konwar den First Lady aser Asst. Governor na tonga arutsü aser Hotel Japfü, Kohima nung committee balala indang tekolakpur aser ketdangsürtem den 1st Business Session agir sülen, Club Assembly agitsü

aser nikongdang session sülen chiyongba mapang aser entertainment agitsü.

Rotary Club, Kohima indang President, Rtn. Kezhokhoto Savi-i, Rotary International indang omen "Service Above Self" nung anidaka, District Governor semdangba anogo nung Club züngsem ajak medema aruagi adentsü asoshi mepishir.

Rotary International indang omen "Service Above Self" ajanga Rotary nung züngsem ajaki nüngdakba purtem tama ser yaritsü asoshi jembir.

Taküm, Rotary International

indang omenji "Serve to change lives" asütsü, kong temelenshi tajung adokdaksür ka jagi asalentong tajung yanglua aser telongjem nung, lokti nung timtem balala jangjateta, item timtem bentetsü asoshi mapa kümä inyakttsüla.

Taoba Hokolbarnü (22.10.2021), Phek District kübok Community Health Centre, Pfutsero aser Primary Health Centre, Khezhakeno naprongla nung Rotary Club, Kohima-i oxygen concentrator, oximeter, face mask aser sanitizer tem tenla agütsüogo, ta kasa sangdong nung shia lir.

AR-i Kezo Town nung saisapong osettem agütsü



Kohima, Mongputeni/October 26, 2021 (TYO): Hombarnü (25.10.2021) HQ IGAR (North) kübok Assam Rifles indang Kohima Battalion-i Chakabama nung Kezo Town lanurtem nem saisapong osettsüset agüja liasü, ta sangdong ajanga metetdaksü.

'Sports Friendly North-East' omen kübok lanurtem tsüingda saisapong ajungketsütsü aser ochishia saisapong nung shilem agütsü ajungmesotsü nükjidong nung Assam Rifles-i item oset agütsü.

Youth Committee, Kezo Town indang Youth President

aser züngsemtemi pelashishia saisapong osettem pelashishia agizük aser iba ama mapa tajung asoshi parnoki Assam Rifles dang pelaba metetdaksü aser iba tesem (Kezo) nung saisapong ajungketsütsü asoshi lanurtemi nangzükogo, ta kasa sangdong nung shia lir.

World Boxing Championship: Akash aser Rohit na tanabuba round-i iogo



Belgrade, Mongputeni/October 26, 2021: AIBA men's world championships 67kg category mezüing round nung, India nung Akash Sangwan-i Turkey nung Furkan Adem madak 5-0 agi takok anguba sülen tangokba noksa ka yangi angur. Brehostibarnü (28.10.2021) tanabuba round nung Akash-i Germany nung Daniel Krotter den asayatsü.

Belgrade, Mongputeni/October 26, 2021 (Agencies): AIBA men's world championships asayamung mezüing bout nung, India nung boxer Akash Sangwan (67kg)-i Turkey nung Furkan Adem madak 5-0 agi takok anguba sülen, pa tanabuba round-i iogo.

Sangwan, shiba national champion ka lir, Brehostibarnü (28.10.2021) pai Germany nung Deniel Krotter den tanabuba round asayatsü.

Mezüing bout nung Sangwan-i Adem amokbanger asaya liasü.

Kasa asayamung tebur mezüing bout tanga ka nung, iba championships nung mezüing shilem agir India nung Rohit Mor (57kg)-i Ecuador nung Jean Caicedo madak 5-0 agi takok angu. Brehostibarnü Rohit-i Bosnia & Herzegovina nung Alen Rahimic den tanabuba round asayatsü.

India nung aser Asian champion Sanjeet (92kg) den Sachin Kumar (80kg)

naprongla iba asayamung nung first-round bye nguogo.

Honibarnü (30.10.2021) Sachin-i America nung Robby Gonzalez den tanabuba round asayatsü. Tena masayadang, Hokolbarnü (29.10.2021) Sanjeet-i Russia nung Andre Stotskii den mezüing bout asayatsü.

Iba asayamung nung, linük 100 dak tema nungi boxer 600 temai shilem agidar. Quarter final stage tongtetsü atema, Category kar nungbo tetokteper (boxer) kari tajemba agi bout asem tashi takok angutsüla.

World Boxing Championship nung gold medal angurtem nem senpet USD 100,000 agütsütsü renema lir.

Kasa asayamung nung silver medal angur boxer nem senpet USD 50,000 aser bronze-medal angurtem nem senpet USD 25,000 agütsütsü. Iba asayamung nung senpet ajunga agi USD 2.6 million asütsü.

2019 Men's World Championships asayamung nung, Indian contingent-i medal ana angu. Iba tetokteper nung, Amit Panghal-i silver medal aser Manish Kaushik-i bronze medal ngua liasü.

Vienna Open: Andy Murray round of 16 tongogo

Vienna, Mongputeni/October 26, 2021 (Agencies): Vienna Open asayamung tebur kija mezüing round asaya nung, Andy Murray-i 6-4, 6-7 (6/8), 6-3 agi seed pungobuba Hubert Hurkacz tsükdaksü. Ita 14 nung top 10 asayar rongnung, Hombarnü Murray-i iba asaya mezüing takok angur asütsü.

Taküm küm tetenzüklen, Cincinnati aser Metz asayamung anaprongla nung Murray-i world no. 10 Hurkacz makok, saka tena tasembenbuba ajurutepa asaya

nung Murray-i Polish nung Hurkacz madak takok nguogo. Iba asayamung mezüing round nung ghonda 2 ser minute 41 shi toktepa asayar sülen, Murray-i takok angu.

2020 küm Cincinnati asayamung nung, asemben tashi Grand Slam takok angur Murray-i Alexander Zverev tsükdaksür külen nungi top 10 nung arishi küm 34 tain Murray-i mezüing takok angur asütsü.

"Künaprongla kanga meranga asayaogo aser iba asaya tajung liasü," ta 2018 aser 2019 küm surgery agisang aser

tang world no. 156 Murray-i ashi.

"Tasembuba set indang mezüing game nung serve nung point mengutetba atema tezütanga liasü, saka tiaka taruba game nung break point agütsü maongka tajung angu aser iba nungi tenzuka ni point angutsü maongka tajung ngutet. Iba ama asaya tasak ka nung takok anguba ya tuluka," ta Murray-i ashi.

Vienna Open tanabuba round nung, Murray-i Spain nung arishi küm 18 tain Carlos Alcaraz den asayatsü.

T20 World Cup: South Africa-i West Indies kokogo

Dubai, Mongputeni/October 26, 2021 (Agencies): Mongolbarnü, Dubai International Stadium kübok T20 World Cup asayamung nung, South Africa-i West Indies madak wicket 8 agi takok nguogo. Iba asaya nung, South Africa nungi Aiden Markram-i half century yanglua liasü. T20I nung Aiden-i half century pungobuba yanglur asütsü.

Iba asaya nung Dwaine Pretorius aser 'player of the match' Anrich Nortje nati bowling nung South Africa team nungitta liasü aser mezüing innings tetenzüklen aser innings atemtsü over pezü tena bowling ajanga West Indies batter tem aziüoka aser West Indies puri run 143/8 yanglutet.

Tanabuba innings mezüing over nung, South Africa captain Temba Bavuma out asüba sülen, team atema (tasembuba wicket) Markram-i külem batter Rassie Van der Dussen den run 83 bendenloktsü.

Van der Dussen-i Reeza Hendricks den (tanabuba wicket) run 57 yanglua liasü, iba sülen Markram-i ball 26 nung run 51 yanglutet, koba ajanga South Africa team nungitogo. Markram-i 6' pezü aser 4 ana zükloktsü.

West Indies pur junga asayatsü tenzükba mapang ka nung Pretorius-i Chris Gayle (12) out sütsü. Iba sülen, West Indies innings indang over tatembuba nung Pretorius-i ano captain Kieron Pollard aser Hayden Walsh jr. naprongla indang wicket agia liasü.

Iba asayamung nung England makokba sülen West Indies team tanabuba match nunga tamakok angur asütsü. Oponer Evin Lewis aser Lendl Simmons naprongla mezüing over 10 tashi junga asayatsü imlaa liasü, saka bilemba metongtet. Lewis-i 6' trok densema ball 35 nung run 56 aser Simmons-i ball 35 nung run 16 dang yanglutet.

21buba NSF Martyrs Memorial Trophy:



Kohima, Mongputeni/October 26, 2021: Indira Gandhi Stadium nung A Yhome FC aser Tsiesema Basa Youth team tsüingda NSF Martyrs Memorial Trophy asayaba mapang tangokba noksa ka yangi angur.

Kohima, Mongputeni/October 26, 2021 (TYO): Mongolbarnü, 21st NSF Martyrs' Memorial Tournament nung, A Yhome Football Club aser Hurricane Boys Phesama nungeri pei pei tata asaya takok ngua pre-quarter finals tongogo, ta sangdong ajanga metetdaksü.

Mezüing match nung, A Yhome FC aser Tsiesema Basa Youth na asaya liasü. Iba asaya nung A Yhome FC-i goal 4-0 Basa Youth tsükdaksü. Yhome FC atema Vilhuobeituo-i minute 10buba nung mezüing goal inoktsü aser minute 65buba nung paisa goal tanabuba idakja liasü. Kasa asaya nung, team atema Avilie Tsukru aser Bijay nati goal ka ka idaktsü.

Tanabuba match nung

Hurricane Boys Phesama aser United Brothers na asaya liasü. Iba asaya nung team anapronglai goal 2-2 idakja draw nung tembangba sülen, tie-breaker ajanga Hurricane Boys Phesama-i goal 3-0 agi United Brothers FC tsükdaksü.

Poireng aser Chonben nati minute 6buba aser 10buba nung United Brothers atema goal ka ka inoktsü. Hurricane Boys-ia telangzüba agüja Medoneisa (38) aser Ato Kaimo (71) nati goal ka ka idakja liasü.

*** Bodhbar (27.10.2021) atema asaya yamai alitsü:**

1. Phesama Youth Organisation vs Magdaline Coaching FC @ 12:30 PM
2. Puliebadze Club Vs Berenike FC Meriema @ 2:00 PM

BILEMDANGANG

"Kati ka dak tai tongloktsüba jagi telok tejakleni maotsü."